



2021

Concept per promover il sport dal chantun Grischun



Coordinaziun da tut las forzas che stattan en il servetsch d'ina promoziun optimala dal sport

Tenor l'artitgel 3 da la Lescha da promoziun dal sport dal chantun Grischun sto la Regenza relaschar in concept cumplessiv per promover il sport ed il moviment. L'Ordinaziun da promoziun dal sport fixe-scha che quest concept stoppia mussar la situaziun actuala en la promoziun dal sport, definir puncts centrals concrets e preschentar mesiras per realisar quests puncts centrals. Il concept duai cumpigliar la collavuraziun cun tut las organisaziuns ch'èn participadas a la promoziun dal sport ed er observar la legislaziun federala.

Ilis chapitels 1 fin 4 descrivan l'intent dal Concept per promover il sport, ils principis da la politica chantunala da sport, l'impurtanza dal sport per il chantun Grischun sco er il motiv e la finamira da l'examinaziun dal concept ch'è en vigur dapi l'onn 2016.

Finamiras e mesiras d'optimaziun

En il chapitel 5 vegnan formuladas las finamiras e las mesiras ch'èn necessarias per sviluppar vinavant la promoziun dal sport en il chantun Grischun. Tras l'examinaziun è cunzunt quest chapitel vegni adattà conform als basegns, e tschertas mesiras èn vegnidas optimadas u adattadas a las cundiziuns generalas. Quai adina cun la finamira da cuntinuar e – sche necessari – d'optimar la promoziun actuala. En quest chapitel vegnan formuladas tut en tut 18 finamiras cun mesiras correspundentas. Lur realisaziun duai vegnir cuntinuada u vegnir integrada da nov ils proxims onns.

Existenza d'ina purschida attractiva da sport

Il chapitel 6 descriva la situaziun actuala en la promoziun dal sport ed enumerescha las numerusas mesiras dals sis accents da promoziun: sport d'uffants e da giuventetgna sco er sport da scola; sport da massa; sport da prestaziun; occurrenz da sport; infrastruttura; infurmaziun e cussegliaziun. Questa enumeraziun mussa ch'il chantun Grischun dispona gia oz d'ina purschida attractiva per la populaziun che fa sport. L'enquista represchentativa «Sport en il Grischun», ch'è vegnida realisada danovamain l'onn 2020, mussa che la populaziun grischuna fa anc adina sport e ch'il sport ha ina fitg buna reputaziun. La cuntentientscha cun la promoziun actuala dal sport è tut en tut gronda.

La basa dal success da la promoziun dal sport è ina buna collavuraziun cun partenaris

Il chapitel 7 declera l'organisaziun dal sport en il chantun Grischun e mussa, cun tge partenaris ch'il chantun vul collavurar en quest sector. Per avair success dovra la promoziun dal sport ina buna collavuraziun ed in entretschament correspundent da tut las organisaziuns participadas. Quai èn las uniuns da sport e lur federaziuns, las vischnancas, ils organs federals, las organisaturas ed ils organisaturs d'occurrenz da sport, las organisaziuns turisticas, las organisaturas ed ils organisaturs da programs e da projects sco er las purtadras dals stabiliments da sport e dals implants da moviment.

Realisaziun durant ils proxims onns

Cun il conclus dals 29.6.2021 ha la Regenza approvà il Concept per promover il sport e deliberà tal per la realisaziun. Ilis posts chantunals cumpetents vegnan incumbensads da realisar las mesiras che tutgan a lur champ da cumpetenza e – sche necessari – da dumandar ils meds finanzials necessaris en il rom dal process da budgetaziun.



2	Resumaziun	3
	1. Intent dal Concept per promover il sport	4
	2. Principis da la politica chantunala da sport	5
	3. Impurtanza dal sport	6
	4. Motiv e finamira da l'examinaziun	6
	5. Finamiras e mesiras a partir da l'onn 2021	8
	6. Situaziun actuala en la promoziun dal sport	14
	7. Organisaziun dal sport en il chantun Grischun e collavuraziun cun las instituziuns ch'èn participadas a la promoziun dal sport	21
	8. Realisaziun	23

1. Intent dal Concept per promover il sport



Il Concept chantunal per promover il sport serva sco basa per tut las mesiras dal chantun en il sectur da la promoziun dal sport e dal moviment. El duai preschentar la situaziun actuala dals differents secturs da la promoziun dal sport e definir ils puncts centrals da la politica da promoziun dal sport. Plinavant duai il concept mussar mesiras che permettan da cuntanscher quests puncts centrals. Quai resguardond la Lescha chantunala davart la promoziun dal sport e dal moviment (Lescha da promoziun dal sport) sco er la legislaziun federala da sport e ses concepts.

La collavuraziun tranter il chantun ed autras instituziuns che lavuran en il sectur dal sport da junioras e juniors, dal sport da massa e dal sport da prestaziun (organisaziuns da sport, vischnancas, persunas privatas e purtadras da programs e da projects che vulan promover il sport ed il moviment, persunas privatas e purtadras da stabiliments da sport e d'occurrentas da sport sco er il turissem) duai vegnir promo-

vida. Medemamain duai vegnir rinforzada entaifer il chantun la collavuraziun da tut ils departaments ed uffizis ch'èn participads en il senn pli stretg e pli vast a la promoziun dal sport e dal moviment. Ultra da graubündenSport e da l'Inspecturat da scola, che tutgan a l'Uffizi per la scola populara ed il sport, èn quai la partiziun Svilup turistic da l'Uffizi per economia e turissem, la partiziun Promoziun da la sanadad e prevenziun da l'Uffizi da sanadad, l'Uffizi da construcziun auta, la partiziun Traffic betg motorisà da l'Uffizi da construcziun bassa sco er l'Uffizi per la furmaziun media-superiura e l'Uffizi per la furmaziun professunala.

Il concept sa basa sin las activitads che derivan da las instituziuns numnadas qua survast e ch'èn impurtantas per la promoziun dal sport; el sa concentrescha dentant er sin quels secturs che vegnan influenzads tras il chantun. Las incumbensas dals singuls departaments ed uffizis èn enumeradas en il chapitel 7.

2. Principis da la politica chantunala da sport

La politica chantunala da sport ha la finamira da mantegnair e da sviluppar vinavant la purschida existenta da pussaivladads da sport e da moviment sco er d'augmentar la quota da la populaziun corporalmain activa.

Per quest intent na tira ina politica da sport moderna betg mo a niz la promoziun dal sport en il senn pli stretg, mabain profita er d'ulteriurs secturs da la guvernanza statala a favur dal sport e dal moviment. Quai èn p.ex. leschas e concepts per la promoziun da la sanadad, per la promoziun dal turissem, per l'educaziun, ma er per la planisaziun dal territori e dal traffic. Per ina vaira collavuraziun na dovri en quest connex betg mo in barat d'infurmaziuns, mabain cunzunt er ina coordinaziun dals differents posts.

Cun ils instruments da la promoziun dal sport en il senn pli stretg promova il chantun en spezial purschidas da sport e da moviment da federaziuns, d'uniuns e d'instituziuns per persunas creschidas, per uffants, per giuvenils e per persunas cun impediments, sch'ellas n'han nagina finamira da rendita, sco er purschidas da sport e da moviment ch'èn independentas d'uniuns, sch'ellas han in grond effect general.

Tenor l'artitgel 1 da la Lescha chantunala da promoziun dal sport promovon il chantun e las vischnancas – en il rom da lur competenzas – las activitads da sport e da moviment da la populaziun e prendan en quest connex en egl spezialmain las suandantas finamiras:

- sustegn da las activitads da sport e da moviment sin tut ils stgalims da vegliadetgna
- esistenza d'ina vasta purschida d'activitads da sport e da moviment en tut las regions
- garanzia da bunas cundiziuns generalas per il sport da prestaziun
- rinforz da la conscienza da l'effect positiv e da la valur dal sport en la populaziun
- cumbat da privels d'accidents da sport e da moviment sco er dals fenomens secundars negativs dal sport

Ultra da la Lescha da promoziun dal sport e da l'ordinaziun da promoziun dal sport èn er la promoziun da la sanadad, la promoziun dal turissem ed ulteriurs secturs politics auxiliars (construcziun, planisaziun dal territori e u.v.) elements impurtants da la politica chantunala da sport.

Per la promoziun dal sport vala en general il princip da subsidiaridad: La realisaziun dal manaschi da sport (trenaments, concurrenz, curs) è en emprima lingia ina incumbensa da las organisaziuns da sport sco er da las ulteriuras organisaturas e dals ulteriurs organisaturs da sport ed è – en il sectur dal sport individual – chausa da mintgina e mintgin sez. Metter a disposiziun l'infrastructura communal da sport e realisar l'instrucziun obligatorica da sport en la scola populara èn incumbensas da las vischnancas. Il chantun sa concentrescha en spezial sin quelas incumbensas che na pon betg vegnir ademplidas tras las vischnancas, tras las organisaziuns da sport e tras las organisaturas ed ils organisaturs privats da sport u che pon vegnir ademplidas da quests gremis mo cun il sustegn dal chantun.



3. Impurtanza dal sport

Il sport collia generaziuns e culturas, promova las cumpetenzas socialas, augmenta la capaciad da prestaziun e la qualiad da viver da la populaziun e presta ina contribuziun impurtanta a favur dal svilup dals uffants e dals giuvenils. Il sport ed il moviment èn da gronda impurtanza per l'integrasiun sociala sco er per la sanadad da la populaziun e per la concepziun da ses temp liber. Grazia a sias qualitats positivass han il sport ed il moviment ina fitg buna reputaziun en il chantun Grischun. La promoziun dal sport da scola sco er dal sport da massa per uffants, per giuvenils e per persunas creschidas è d'in interess public en vista a la gronda impurtanza per la societad ed en vista al potenzial preventiv.

Il sport è in factur economic impurtant en il chantun Grischun. Occurrenzass ed infrastrukturas da sport attractivas sustegnan la qualiad dal chantun sco lieu da sport. Ellas èn impurtantas per la promoziun dal turissem ed enritgeschan la purschida da divertiment. Sportistas e sportists d'elita curunads da success represchentan il chantun ed èn figuras d'identificaziun impurtantas. En il rom da sias pussaivladass promoia il chantun perquai il sport da prestaziun e sustegna la realisaziun da l'infrastructura da sport necessaria.

Il sport ed il moviment han ina gronda impurtanza per la populaziun dal chantun Grischun. Il studi «Sport en il Grischun 2020» mussa che la populaziun grischuna è er vinavant ordvart sportiva. Trais quarts da la populaziun fan almain ina giada per

emna sport, schizunt 79 pertschient adempleschan las recumandaziuns da moviment da l'Uffizi federal da sport e da l'Uffizi federal da sanadad publica e la quota da nunsportistas e nunsportists sa reduce-scha. En general ha il sport ina buna reputaziun en il Grischun, schizunt tar las persunas che na fan betg sport. La cuntentientscha cun la promoziun actuala dal sport è fitg gronda, cumbain che var in terz da las Grischunas e dals Grischuns è da l'avis ch'i duess vegnir fatg anc dapli. La promoziun d'uffants e da giuvenils stat spezialmain a cor a la populaziun. Ed in grond giavisch è er ch'ils conturns da l'abitaziun e las plazzas da pausa vegnian concepids uschia, ch'els promovian il moviment. 23 pertschient da la populaziun grischuna è participada activamain en in'unioni da sport ed in tschintgavel è commember d'in center da fitness. In quart da la populaziun grischuna s'engascha en x ina furma voluntarmain e gratuitamain per il sport.

Las prestaziuns dal chantun èn da gronda impurtanza per il funcziunament dal sport en il Grischun. Mantegnair e sviluppar vinavant la buna purschida da sport actuala è dentant mo pussaivel, sch'er las autras instituziuns ch'èn participadas a la promoziun dal sport – en spezial las federaziuns da sport e lur uniuns sco er las vischnancas – pon furnir er vinavant ed en ina buna qualiad lur activiad en quest sector. Las mesiras previsas en quest concept duain sustegnair questas purtadras impurtantas dal sport grischun en lur activiad a favur da la promoziun dal sport.

4. Motiv e finamira da l'examinaziun

Il Concept per promover il sport dal chantun Grischun è en vigur dapi l'onn 2016. Durant ils ultims 4 onns èsi vegni lavurà fitg activamain vi da la realisaziun da las mesiras concluidas. Da las finamiras fixadas èn 15 vegnidas realisadas e 6 cuntanschidas parzialmain. Tras l'examinaziun vegn ussa actualisada la descripziun da la situaziun en la promoziun dal sport, e sin basa da l'inventarisaziun e dal svilup actual vegnan las finamiras e las mesiras adattadas a las novas cundiziuns generalas ed als novs basegns.

L'examinaziun è vegnida accompagnada d'ina gruppa da project che sa cumponiva da collavuraturas e collavuraturas da differents posts chantunals engaschads en la promoziun dal sport sco er da l'Associaziun grischuna da sport BVS (associaziun da tetg da

las federaziuns grischunas da sport). Las partenarias las pli impurtantas en la promoziun dal sport, vul dir las federaziuns da sport e las vischnancas, èn vegnidas integradas en l'examinaziun ed han pudì valitar la promoziun chantunala actuala dal sport a maun d'ina enquesta online. Igl è er stà pussaivel da proponer novas finamiras e mesiras. Da princip han ins pudì constatar che las federaziuns e las vischnancas participantas èn fitg cuntentas cun la promoziun dal sport d'enfin ussa (Ø 3,28 da max. 4 puncts).

Sin fundament dals resuns da las partenarias sco er sin basa da las experientschas dals ultims 4 onns èn las finamiras vegnidas revedidas ed actualisadas (guardar chapitel 5).



5. Finamiras e mesiras a partir da l'onn 2021



5. Finamiras e mesiras a partir da l'onn 2021

Il chantun Grischun ha la finamira da mantegnair e da sviluppar vinavant la purschida existenta da pussaivladads da sport e da moviment sco er d'augmentar la quota da la populaziun corporalmain activa. El dispona d'ina vasta purschida da sport, d'uniuns da sport activas e da bunas cundiziuns generalas per il sport e per il moviment. En il rom da l'examinaziun dal concept qua avant maun hai pudì vegnir constatà ch'ìls partenaris involvids èn fitg cuntents cun la promoziun actuala. Er la populaziun è fitg cuntenta cun la purschida da pussaivladads / servetschs / sustegn da sport, sco ch'ì resorta dal studi «Sport en il Grischun 2020».

La promoziun actuala duai vegnir continuada e – sche necessari – vegnir optimada. Las finamiras e las mesiras fixadas cuminaivlamain la fin da l'onn 2015 èn vegnidas giuditgadas en in process participativ en il rom da l'examinaziun dal Concept per promover il sport 2020/2021. Ellas èn vegnidas adattadas a las novas cundiziuns generalas, ed en cas da basegn èn vegnidas formuladas novas mesiras. Las consequenzas da la pandemia da corona per il sport en il chantun vegnan observadas. Sche necessari vegnan examinadas e realisadas mesiras correspondentas.



5.1 Sport d'uffants e da giuventetgna, sport da scola

La paisa principala da la promoziun chantunala dal sport duai esser er en l'avegnir sin la promoziun dal sport d'uffants e da giuventetgna e sin il sport da scola. Qua vegn mess il fundament per far sport per vita duranta.

a) Purschidas per uffants da la vegliadetgna prescolara

Finamira

Tut ils uffants pitschens en il chantun Grischun han access a purschidas da moviment che correspundan a lur vegliadetgna.

Mesira

- Il chantun garantescha a lunga vista la finanziaziun da la purschida da ma-pi / ba-pi per uffants da la vegliadetgna prescolara.

b) Sport da scola obligatoric

Finamira

- Il chantun promova las cumpetenzas da las persunas d'instrucziun da sport e procura – ensemen cun la Scola auta da pedagogia (SAPGR)

- per la garanzia da la qualitad en la scolaziun ed en la furmaziun supplementara. La SAPGR tematisescha il sport da massa, integrescha en la scolaziun curs da manadras e manaders da G+S e porscha furmaziuns supplementaras per las persunas d'instrucziun da sport.

Mesira

- Il chantun s'engascha per ina buna instrucziun da sport sin tut ils stgalims.
- La SAPGR s'engascha – ensemen cun il chantun – per la furmaziun supplementara da las persunas d'instrucziun da sport.

c) Sport da scola voluntar

Finamira

En tut il chantun exista ina purschida complessiva da sport da scola voluntar sin tut ils stgalims da scola. Purschidas da sport da scola voluntar èn uschè multifaras sco pussaivel ed èn ina part fixa da la planisaziun annuala da las scolas grischunas. Ellas sa drizzan a tut ils uffants e giuvenils, en spezial a tals che n'han nagin access al sport ed al moviment.

Mesira

- Il chantun sustegna il sport da scola voluntar tras ina promoziun activa en las scolas ed en las uniuns e federaziuns da sport e mussa ses potenzial e sia funcziun da punt.
- El metta a disposiziun impuls finanziaziunals sper las contribuziuns federalas da G+S. Supplementarmain pon vegnir mess a disposiziun programs e lecziuns da model per concepir ils trenaments da maniera uschè multifara sco pussaivel.

d) Promoziun dal moviment en scolas grischunas

Finamira

Las scolas grischunas sustegnan il moviment ed il sport e realiseschan mintga di unitads da moviment.

Mesira

- Il chantun garantescha il sustegn professional e la finanziaziun dal program «Cupitgarola» en las canortas ed en las scolinas, dal program «Scola en moviment», d'ulteriuras iniziativas da moviment sco er da mesiras per la promoziun da la sanadad (tranter auter Rait da scolas21 [Schulnetz21.ch]).
- Las vischnancas procuran ch'ìls uffants possian cuntanscher la scola bain e seguir a pe u cun velo. Il chantun cussegla las vischnancas en quest regard.

e) Sport da naiv

Finamira

Ils uffants da scola dal Grischun han access al sport da naiv, emprendan ad enconuscher il sport da naiv sco bain cultural e fan experientschas cun il sport da naiv. Las persunas che

5. Finamiras e mesiras a partir da l'onn 2021

prendan decisuns sin il stgalim communal èn persuadidas da l'impurtanza dal moviment activ en la naiv. Il chantun sustegna la realisaziun activa d'iniziativas da moviment en il sport da naiv.

Mesira

- A las scolas ed a las vischnancas vegni recumandà da facilitar l'access al sport da naiv tras emnas da sport da naiv en scolina e da porchers – sin ils stgalims pli auts – regularmain dis da skis ed autras activitads da sport da naiv resp. da pussibilitar als uffants da scola da sa participar a talas occurrenz. Il chantun garantisce la finanziaziun da las emnas da sport da naiv en scolina.
- Tras la promoziun activa da projects actuals ed adattads per la promoziun dal moviment en il sport da naiv (p.ex. GoSnow) procura il chantun che las purschidas vegnian rendidas enconuschentas e ch'ils aspects da la politica da sport, d'economia e da furmaziun vegnian resguardads en moda eguala en quest connex. Ultra da quai promova el scolaziun e furmaziun supplementaras per las persunas d'instrucziun grischunas en sport da naiv ed en sport al liber.



5.2 Promoziun generala dal sport da massa

Las purschidas en il sector dal sport da massa èn multifaras e vegnan sustegnidas dal chantun. Las purtadras las pli impurtantas èn las uniuns da sport, las instituziuns che lavuran en il sector da la promoziun da la sanadad sco er campagnas naziunalas, sco p.ex. «Svizra en moviment». En collavuraziun cun la Confederaziun e cun sias organisaziuns partenarias avisescha il chantun – er ensemen cun auters chantuns – in standard da qualidad unitar en la scolaziun ed en la furmaziun supplementara dal sport da persunas creschidas (esa). Areguard il sustegn finanziar sa focussescha el sin ils secturs dal sport d'uffants e da giuventetgna.

a) Campagna da publicitad sco er iniziativa da sport e da moviment

Finamira

La populaziun grischuna considerescha il sport sco sector da la vita impurtant che gida ad augmentar la qualidad da viver. La populaziun renconuscha la lavur preziosa da las uniuns e federaziuns da sport per la coesiun sociala. Ella enconuscha e nizzegia las purschidas da sport e

da moviment e vesa sia influenza sin lur sanadad e sin la capacitad da prestaziun corporala.

Mesira

- Ensemen cun las uniuns e federaziuns da sport organisescha il chantun in «Di dal sport grischun» sco factur d'identitad.
- Il chantun lantscha cun cleras finamiras iniziativas da sport e da moviment e promova ina cultura da moviment positiva. El stgaffescha cundiziuns generalas per purschidas, a las qualas ina gronda part da la populaziun po sa participar, ma en spezial er purschidas per gruppas cun in access pli difficil al sport.


b) Curs da scolaziun per manadras e manaders giuvens («1418Leiter»)

Finamira

Giuvenils da 14 fin 18 onns en il chantun Grischun surpiglian responsabladad en lur uniun da sport e gidan uschia a chattar manadras e manaders en uffizi d'onur ed ad impedir che commembras e commembers sortian gia baud da l'uniun.

Mesira

- En coordinaziun cun la Confederaziun amplifitgescha il chantun – per tschertas disciplinas da sport – la scolaziun adequata da giuvnas manadras auxiliarias e da giuvens manaders auxiliars a partir da 14 onns.



5.3 Sport da prestaziun

La promoziun dal sport da prestaziun è sin in bun nivel en il chantun Grischun. En spezial areguard la cumpatibilitad dal sport da prestaziun cun la scolaziun u cun la professiun realisescha il chantun dapli mesiras:

a) Cumpatibilitad dal sport da prestaziun cun la scola

Finamira

Sco chantun che sustegna il sport dispona il Grischun d'ina rait da scolas da talents confurmas als basegns sco er d'ina purschida raschunavla da scolas medias da sport e da scolas professiunals che faciliteschan la cumpatibilitad dal sport da prestaziun cun la scola.

Mesira

- Cun contribuziuns finanzialas per ils custs supplementars che resultan per assister ils talents promova il chantun scolas da talents sin il stgalim secundar I sco er instituziuns da furmaziun

5. Finamiras e mesiras a partir da l'onn 2021

dal stgalim secundar II che han purschidas da sport cun structuradas specificas. El definescha las cundiziuns generalas per l'instituziun da furmaziun specifica e coordinescha las differents purschidas.

- Il chantun promova ina tenuta da basa che sustegna il sport ed in urden d'absenzas flexibel per sportistas e sportists da prestaziun a la Scola chantunala grischuna.
- En sias scolas autas promova el in'applicaziun flexibla dal temp da studi e da la cumpilaziun da moduls da roms. El sustegna l'installaziun da studis a distanza.

b) Centers regionalis e naziunals da prestaziun

Finamira

Il Grischun dispona da cundiziuns generalas e da structuradas che promovon il sport da prestaziun per pudair promover las junioras ed ils juniors sin in aut nivel da qualidad.

Mesira

- Ils centers regionalis e naziunals da prestaziun vegnan sustegnids dal chantun cun contribuziuns da gestiun, e quai en cumbinaziun cun ils daners da promoziun da junioras e juniors da Swiss Olympic sco er cun las contribuziuns da G+S pajadas en il sport da prestaziun. Uschia duai vegnir promovì en spezial l'engaschament da trenadras giuvnas e trenaders giuvens che han las qualificaziuns necessarias.
- Projects per novs centers da prestaziun vegnan promovids cun ina finanziaziun da partenaria.

c) Chantun e vischnancas sco manaschis d'empredissadi e sco patruns che sustegnan il sport da prestaziun

Finamira

A lur emprendistas ed emprendists ed a lur lavurantas e lavurants pussibiliteschan il chantun e las vischnancas ina carriera da sport da prestaziun parallelamain a la furmaziun fundamentala professiunala u a l'engaschament fix. En quest sector fungheschan il chantun e las vischnancas sco exempels per manaschis privats.

Mesira

- Il chantun sustegna las stentas da sias unitads administrativas da cuntanscher il label «manaschis d'empredissadi che sustegnan il sport da prestaziun» da Swiss Olympic.
- Il chantun porscha engaschaments a temp parzial che pussibiliteschan d'avair in'activitad da gudogn sper la carriera da sport d'elita.
- Tras ina promoziun activa recumonda il chantun a las vischnancas ed a las firmas da facilitar la cumpatibilitad dal sport da prestaziun cun la scolaziun u cun la professiun.



5.4 Occurrenz da sport

Il chantun dispona d'in grond dumber d'occurrenz d'alta qualidad, e quai davent dal sport da massa fin al sport d'elita internaziunal. Contribuziuns or da la finanziaziun speziala Sport sco er contribuziuns sin basa da la Lescha davart il svilup economic garanteschon er vinavant la realisaziun d'occurrenz ed uschia tut en tut in aut nivel en la promoziun d'occurrenz.

Finamira

Il chantun promova la cultura d'organisaziun en il Grischun ed optimescha las cundiziuns generalas per realizar occurrenz naziunalas ed internaziunalas, er en il sector da giuventetgna.

Mesira

- Il chantun sustegna er occurrenz da sport spezialas che han lieu irregularmain, ma ch'èn impurtantas per la percepziun dal Grischun tras persunas externas.
- Il chantun iniziescha ina scuntrada annuala da barat e da rait per organisaturas ed organisaturas d'occurrenz grondas (transfer da savida, voluntarias e voluntaris, segirezza, pool da material, acziuns da la Protecziun civila e.u.v.).



5.5 Infrastructura da sport

Il chantun dispona d'ina buna infrastruttura da sport e sustegna la construcziun da stabiliments novs en il rom da las leschas chantunals. Proprietarias da la gronda part dals stabiliments da sport èn las vischnancas sco er instituziuns da dretg privat. En quest sector cumpiglia l'activitad dal chantun perquai en emprima lingia il sustegn da projects che meritan da vegnir promovids, sco er mesiras legislativas ed incumbensas da cussegliaziun:

a) Spazis per sa mover

Finamira

Entaifer ils abitadis ed a l'ur da tals disponan il Grischun e sias vischnancas d'avunda spazis publics e privats, nua che uffants, persunas creschidas e persunas attempadas pon sa mover, giugar e sa trategnair en moda segira. Plazzas da giugar e da pausa attractivas sco er zonas d'inscunter, plazzas e parcs interessants èn colliads in cun l'auter e cuntanschibels senza privels sur vias (da quartier) nua ch'il traffic è quietà u sur vias da velos e da spassegiar segiras ch'èn separadas dal traffic motorisà. Zunt impurtantas èn vias da scola e da scolina segiras ed attractivas. Infrastructuras sco hallas da sport, plazzas da sport, bogns e.u.v. stattan a disposiziun conform als basegns al sport d'uniuns ed a la populaziun. La cuntanschibladad dals spazis da sport, da moviment e da recreaziun locala en ils abitadis, en la natira ed en la cuntrada è, sche pussaivel, garantida tras colliaziuns dal traffic betg motorisà ed è en in stadi che correspunda als basegns. L'infrastructura necessaria stat a disposiziun.

Mesira

- Il chantun optimescha las cundiziuns generalas per il moviment e per il sport da tut la populaziun e garantescha las infrastructuras ed ils spazis per sa mover necessaris cun agid da la planisaziun dal traffic e dal territori. Ils interess dal sport e dal moviment ch'èn relevants per il territori franchisescha el sco valurs da planisaziun en la planisaziun directiva chantunala e regiunala sco er en la planisaziun d'utilisaziun communal.
- Il chantun procura che l'utilisaziun da la natira e da la cuntrada saja garantida conform als basegns e resguardond sia sensibilidà sco spazis per il sport e per il moviment, e che l'infrastructura necessaria vegnia messa a disposiziun.
- Il chantun cussegla las vischnancas, sch'i sa tracta da crear spazis per sa mover, e metta a disposiziun concepts correspundents (tranter auter mussavias per spazis libers che promovon il moviment en las vischnancas).

b) Concept per implants da sport d'impurtanza chantunala (CISIC)

Finamira

Il chantun dispona d'in concept per implants da sport d'impurtanza chantunala che permetta da promover cun cleras finamiras ina infrastructura da sport che satisfa als basegns en il chantun Grischun e che resguarda ils interess da la promoziun dal sport (trenament e concorrenza) sco er dal svilup economic (attractività dal lieu e turissem).

Mesira

- Il chantun examinescha periodicamain ils principis ed ils cuntegns dal CISIC e resguarda en quest connex er il svilup sin plaun naziunal areguard il Concept per implants da sport d'impurtanza naziunala (CISIN) ed areguard occorrenzas grondas.

c) Infrastructura da sport da scola

Finamira

Las scolas grischunas disponan d'ina infrastructura da sport moderna ed attractiva che stat da princip a disposiziun er al sport d'uniuns ed ad autras organisaziuns activas en la promoziun dal sport. Ils stabiliments da sport ed ils spazis per sa mover èn bain accessibels e pon vegnir duvrads en differentas modas.

Mesira

- Per garantir la qualidà a lunga vista examinescha il chantun periodicamain las recumandaziuns per l'equipament da hallas da gymnastica ed in program da spazis minimal per il sport en scola che resguarda er ils basegns dal sport d'uniuns.
- Il chantun meglierescha ed optimescha l'utilisaziun dals stabiliments da sport tras lavur da scleriment e tras recumandaziuns a las vischnancas.



5.6 Center da competenza per il sport

L'actività d'infurmaziun e da cussegliaziun dal chantun cumpiglia actualmain en emprima lingia las campagnas per la promoziun dal moviment, la cussegliaziun da las vischnancas en connex cun endrizzar spazis per sa mover, l'organisaziun da furmaziuns supplementaras per persunas d'instrucziun sco er la promoziun da junioras e juniors. Ulteriuras infurmaziuns e cussegliaziuns vegnan puschidas per gronda part sur la pagina d'internet u sin dumonda. Per pudair dar infurmaziuns tenor las finamiras e conform als basegns da la clientella e per pudair prestar servetschs d'alta qualidà, duai graubündenSport servir sco post da contact per tut las dumondas en connex cun il sport. Il center da cumpetenza dispona da las infurmaziuns necessarias en connex cun il sport en il chantun Grischun, respunda dumondas ed intermediatescha activamain infurmaziuns u procura per ils contacts necessaris.

a) Post da contact cumpetent

Finamira

A las acturas ed als acturs en il sport grischun stat a disposiziun in post da contact cumpetent per l'infurmaziun e per la cussegliaziun. Quest post resguarda ils interess da la clientella, coordinescha ils scleriments interns e po dar infurmaziuns conform als basegns.

Mesira

- Sco «single point of entry» (unic punct d'entrada) è francà – cun graubündenSport – in center da cumpetenza per il sport en il chantun Grischun. Ad organisaziuns da sport, ad organisaturas ed organisaturs da sport sco er a vischnancas serva el sco post da consultaziun per dumondas da tut gener en connex cun il sport, tranter auter cun cussegliaziuns en il sector da las permissiuns, da la persistenza, da la segirezza (traffic), da l'infrastructura e da l'etica, cun metter a disposiziun glistas da controlla correspundentas e cun intermediar contacts.
- Il tema «inclusiun» survegn in'attenziun speziala e la cussegliaziun vegn garantida. Quai er en vista a la candidatura per realisar ils Special Olympics World Winter Games 2029 a Cuira.
- Il chantun examinescha il basegn e la realisabladad per l'utilisaziun cuminaivla da las resursas sco instruments, infrastructuras, contabilitad e.u.v. tras las federaziuns.

b) Infurmaziun e comunicaziun

Finamira

Sur ses chanals da comunicaziun procura graubündenSport che las gruppas en mira chatian tut las infurmaziuns davart il tema «sport en il Grischun» e communitgescha activamain vers anora.

Mesira

- Il chantun rinforza sia lavur da publicità davart il tema «promoziun dal sport e dal moviment». En quest connex lantscha graubündenSport ina newsletter che cumpara regularmain e che infurmescha davart novitads, projects e puschidas da la promoziun dal sport e dal moviment.

c) Raits localas da moviment e da sport

Finamira

En la vischnanca u en la corporaziun da vischnancas (regiun) èn tut las acturas ed ils acturs da la promoziun dal moviment e dal sport colliads in cun l'auter, e tras la collavuraziun coordinada èn avant maun meglras cundiziuns generalas per il moviment e per il sport (punct central da svilup dal program da la Regenza 2021–2024). Grazia a raits localas e regiunalas da moviment e da sport sa movan dapli abitantas ed abitants.

Ellas ed els pon far sport tut tenor lur basegns. D'ina vart vegn promovida uschia l'attractività dal lieu, da l'autra vart vegn prestada ina contribuziun a la sanadad fisica, psichica e sociala da la populaziun.

Mesira

- Cun agid d'infurmaziuns (broshuras, occorrenzas d'infurmaziun, discurs da cussegliaziun) vegnan las vischnancas sensibilisadas per la coordinaziun dal sport.
- Il chantun conceda ina finanziaziun da partenenza per stgaffir in post per la coordinaziun dal sport en las vischnancas/corporaziuns da vischnancas.
- Il chantun procura per la colliaziun e per il barat d'experientschas regular tranter las raits localas da moviment e da sport.

d) Svilup da las federaziuns e da las uniuns da sport

Finamira

Las organisaziuns grischunas da sport han structures effizientas ed efficacias, sa sviluppan vinavant e disponan da funcziunaris e funcziunaris en uffizi d'onur che han competenzas da management da sport. Las acturas ed ils acturs en il sport grischun èn colliads in cun l'auter, profiteschon dal know-how vicendaivel e sa sviluppan vinavant.

Mesira

- Cun il sustegn dal chantun ed en collavuraziun cun la Scola auta spezialisada dal Grischun (SASGR) promova l'Associaziun grischuna da sport – sut la designaziun «update!Sport» – scolaziuns adattadas per uffizis d'onur en il sector da la gestiun d'uniuns e da federaziuns.
- Il chantun coordinescha l'entretschament ed il barat da savida. Per quest intent organisescha el dietas correspundentas en collavuraziun cun l'Associaziun grischuna da sport.
- Il chantun cussegla e sustegna las federaziuns da sport en l'ulteriur svilup e rinforzà il barat individual.

6. Situaziun actuala en la promoziun dal sport

La populaziun grischuna è anc adina ordvart sportiva. Suenter la leva reducziun da l'onn 2014 è l'activitad sportiva puspè s'augmentada. Trais quarts da tut las Grischunas e Grischuns fan almain ina giada per emna sport. 51 pertschient fan pliras giadas per emna sport e cuntanschan uschia ina durada totala d'almain 3 uras. 20 pertschient da la populaziun è schizunt activs durant passa 7 uras. 79 pertschient adempleschan las raccomandaziuns da moviment da l'Uffizi federal da sport e da l'Uffizi federal da sanadad publica. La quota da nunsportistas e nunsportists è sa reducida allegraivlamain dapi l'onn 2014 per 8 puncts procentuals a 14 pertschient. En media pratitgeschan las Grischunas ed ils Grischuns 4,4 disciplinas da sport – il Grischun è damai extraordinariamain polisportiv.

Areguard l'activitad sportiva han las dunnas schizunt surpassà ils umens dapi l'onn 2014. Anc adina vala la regla ch'in stgalim da furmaziun pli aut ed entradas da la chasada pli grondas van maun en maun cun dapli activitad sportiva. Las migrantas ed ils migrants èn cleramain main sportivs che la populaziun indigena, ma cunzunt las dunnas estras han preni s'entier cleramain.

La cuntentientscha cun la promoziun actuala dal sport è fitg gronda ed en tut ils secturs anc in pau pli gronda ch'en la media svizra. Var in terz da las Grischunas e dals Grischuns è dentant da l'avis ch'i duess vegnir fatg anc dapli.

La promoziun dal sport tras il chantun en collavuraziun cun las vischnancas, cun las federaziuns e cun las uniuns da sport, cun las scolas e cun las scolas autas cumpiglia actualmain ils suandants secturs:



6.1 Sport d'uffants e da giuventetgna, sport da scola

a) Curs da scolaziun e da furmaziun supplementara da Giuventetgna+Sport

En il rom dal program federal Giuventetgna+Sport (G+S) realisescha graubündenSport mintga onn en media 70 curs da sport per manadras e manaders sco er per expertas ed experts da G+S e plinavant 12 curs da scolaziun e da furmaziun supplementara

per coachs da G+S. En tut vegnan purschids curs per 24 disciplinas da sport. L'onn 2019 han circa 2000 persunas frequentà in curs da manadra u manader ubain ina furmaziun supplementara. Mintga onn vegnan er purschids moduls e curs che cumpiglian pliras disciplinas da sport e che chattan grond interess. Curs da G+S pon vegnir frequentads da persunas a partir da 18 onns.

b) Sustegn da G+S

Cun prestaziuns da lavur dal chantun (support e cussegliazion dals coachs da G+S, examinaziun e permissiun da las purschidas) sustegna graubündenSport las uniuns da sport, las purtadras da scola e las vischnancas tar la realisaziun dal program federal. L'onn 2019 han las organisaziuns grischunas da sport realisà 2045 curs e champs cun circa 24 000 uffants e giuvenils.¹

c) Contribuziun da promoziun da G+S

Il chantun conceda mintga onn ina contribuziun² a las federaziuns da sport per lur sustegn e per lur collavuraziun en il program da G+S. La contribuziun stat en proporziun cun l'autozza da las activitads da G+S da la federaziun respectiva.

d) Curs da scolaziun per manadras e manaders giuvenils («1418Leiter»)

Dapi l'onn 2018 porscha il chantun fins d'emna da scolaziun per manadras e manaders giuvenils da 14 fin 18 onns³. Suenter las scolaziuns èn ils giuvenils activs en lur uniun da sport sco manadras e manaders auxiliars e vegnan uschia manads pass per pass a l'activitad d'instrucziun. Ils curs vegnan realisads en collavuraziun cun las federaziuns chantunals da sport e svilupads vinavant en il barat cun auters chantuns. Numerus giuvenils che han visità ils curs da «1418Leiter» han gia frequentà en il fratemp in curs da manadras e manaders da G+S ed han pia cuntinuà cun l'activitad d'instrucziun, quai ch'è ina da las finamiras.

e) Champs da sport da giuventetgna

Durant las vacanzas da scola realisescha il chantun mintga onn champs da sport da giuventetgna polisportivs per giuvenils⁴. Sin basa da la collavuraziun cun ils auters chantuns da la Svizra Orientala stattan a disposiziun als giuvenils grischuns bunamain 70 champs.

6. Situaziun actuala en la promoziun dal sport

f) Furmaziuns supplementaras en il sport da scola

Las persunas d'instrucziun da sport èn obligadas da vart dal chantun da frequentar mintga onn ina furmaziun supplementara d'almain in mez di en sport. Per quest intent dispona il chantun d'in sistem da cussegliastras e cussegliastrs da gimnastica. En in curs annual vegnan scolads 38 cussegliastras e cussegliastrs da gimnastica sco multiplicaturs che dattan vinavant lur savida a las persunas d'instrucziun da sport en curs regiunals. graubündenSport organischa e finanziescha la scolaziun da las cussegliastras e dals cussegliastrs da gimnastica, als infurmescha davart novaziuns en il sport da scola ed als sustegna tar la cussegliazion da las persunas d'instrucziun en dumondas da l'instrucziun da gimnastica e da sport. Ultra da quai organischa graubündenSport furmaziuns supplementaras en il sport da scola che sa drizzan directamain a las persunas d'instrucziun.

g) Material d'instrucziun

Per l'instrucziun obligatorica da sport en scola è decisiv il Plan d'instrucziun 21 Grischun. Perquai ch'in med d'instrucziun naziunal per sport manca per la scola obligatorica, sustegna il chantun las persunas d'instrucziun da sport cun material d'instrucziun. Da la pagina d'internet pon las persunas d'instrucziun chargiar giu lecziuns preparadas ed acceder ad ina collecziun da links e dad apps.

Il med d'instrucziun «Sport en scolina», che graubündenSport ha elavurà l'onn 2020, cuntogna infurmaziuns davart las basas fisicas dals uffants da 5 e 6 onns, davart la qualitad da l'instrucziun da sport sco er var 70 lecziuns per l'instrucziun da sport sin il stgalim da la scolina. Questa collecziun d'exercizis e da gieus existents duai servir sco mussavia u sco inspiraziun per l'instrucziun da sport sin il stgalim da la scolina e cumpiglia – cun excepziun da «Sa mover en l'aua» – tut ils champs da cumpetenza dal rom Moviment e sport tenor il Plan d'instrucziun 21. Er per la 1. fin 3. classa exista in ordinatur «Unitads d'instrucziun» cun lecziuns che sa basan ina sin l'aua e cun tests appartegnents sco meds d'agid e sco agids d'orientaziun per la varietad indispensabla da l'instrucziun da sport sin il stgalim primar. Las lecziuns pon vegnir realisadas 1:1 en la halla da gimnastica. Ma ellas cuntengan er indicaziuns per variaziuns individualas.

h) Examen da sport da scola

En il chantun Grischun ha lieu en la 5. ed 8. classa in examen da sport da scola. Per l'organisaziun e per la realisaziun èn responsabels las cussegliastras ed ils cussegliastrs da gimnastica. graubündenSport met-

ta a disposiziun ils documents d'examen e maina ina banca da datas, nua ch'i vegnan registrads ils resultats. Las scolaras ed ils scolars survegnan in diplom cun ils resultats ed – a partir d'in tschert dumber da puncts – differentas distincziuns.

i) Dis chantunals da sport da scola

Ils dis chantunals da sport da scola vegnan planisads e realisads tras organisaturas ed organisaturs externs, dentant cun il sustegn finanziel ed administrativ da graubündenSport. Per onn da scola datti en tschintg disciplinas da sport (ballape, ballabasket, ballarait, unihoc, cursa d'orientaziun) mintgamai in di chantunal da sport da scola. Las equipas victuras sa qualifitgeschan per il di svizzer da sport da scola resp. per concurrenzias svizas correspundentas en la disciplina da sport respectiva. Lur custs da viadi vegnan surpigliads dal chantun.

j) Sport da scola voluntar

Il chantun promova il sport da scola voluntar sco cumplettaziun da l'instrucziun obligatorica da sport en scola e sco liom al sport privat d'uniuns. Per purtadras da scola che porschan curs dal sport da scola voluntar vegn la contribuziun da G+S da la Confederaziun auzada sin ina summa pauschala. Per curs e per semester importa quella maximalmain 1050 francs per almain 15 lecziuns instruidas a 45 minutas resp. maximalmain 1350 francs per almain 15 lecziuns instruidas a 90 minutas. Plinavant vegn pajada per champs dal sport da scola voluntar ina contribuziun supplementara da maximalmain 100 francs per di da champ.⁵



6.2 Promoziun generala dal sport da massa

a) Contribuziun pauschala a federaziuns

A las commembras ed als commembers da l'Associaziun grischuna da sport vegnan pajadas contribuziuns pauschalas or dal fond da sport per la lavur generala da federaziun e d'uniun⁶. Las contribuziuns pauschalas annualas vegnan eruidas sin basa dal dumber d'uniuns en la federaziun respectiva, sin basa dal dumber da commembras activas e commembers activs sur e sut 20 onns e sin basa da las activitads da G+S tenor la statistica da l'uffizi federal da sport. A l'organisaziun da persunas cun impediments Procap vegn concedida mintga onn ina con-

¹ Per quest intent han ellas survegnì contribuziuns federalas da 2 411 144 francs.

² Per il mument totalmain 44 000 francs.

³ En media vegnan scolads en 4 curs ca. 100 giuvenils per onn.

⁴ Per il mument 7 champs per ca. 360 participantas e participants.

⁵ L'onn 2019 èn vegnids realisads 286 curs e 42 champs cun 4395 scolaras e scolars en il rom dal sport da scola voluntar.

⁶ Per il mument importan quellas totalmain 1 milliun francs.

6. Situaziun actuala en la promoziun dal sport

tribuziun pauschala separada per la promoziun dal moviment d'umans cun impediments.

b) Material da sport

Per cumprar material da sport ed urdains da sport che appartegnan a las uniuns pon uniuns e federaziuns da sport survegnir ina contribuziun da 40 pertschient dals custs imputabels or dal fond da sport.⁷ Dapi il settember 2020 vegnan liquidadas tut las dumondas da contribuziun per material da sport sin via digitala.

c) Sustegn per projects da promoziun dal sport

Il chantun po conceder contribuziuns or dal fond da sport a projects generals da promoziun dal sport, en spezial a projects da la promoziun dal sport da giuventetgna. Excluz èn projects che servan ad ademplir incumbensas da dretg public, projects da caracter commercial sco er projects che vegnan subvenziunads sur la contribuziun pauschala annuala en il rom da l'activitad normala da la federaziun.⁸ Dapi il settember 2020 vegnan liquidadas tut las dumondas da contribuziun per projects da promoziun dal sport sin via digitala.

d) Promoziun dal moviment en scola, en scolina, en canortas ed en gruppas da giu

Il sport ed il moviment èn facturs impurtants per promover la sanadad sco er per impedir surpais ed autras malsognas betg transmissiblas. Cun il program «Es ti fit? Pais saun en il Grischun» s'engascha il chantun, en collavuraziun cun la Promoziun Sanadad Svizra, per in pais saun tar uffants e tar giuvenils. Ensem cun vischnancas, cun scolas, cun scolinas, cun canortas d'uffants, cun gruppas da giu e cun personas spezialisadas vegnan realisads projects che animechan ils uffants e lur geniturs a dapli moviment ed ad in nutriment saun. Il program d'acziun s'engascha tranter auter per dapli moviment en las scolas («Scola en moviment»), en las scolinas ed en las canortas («Cupitgarola») sco er en las gruppas da giu.

Cun la chascha da moviment dad «Es ti fit?» èn vengidas creadas 120 cartas da moviment cun gieus e cun exercizis per la scolina en moviment. Quellas pon vegnir realisadas spontanamain e senza stuair organisar blier material. Ils 8 sets cuntengnan 15 ideas da moviment (gieus per dadens e dadora sco er exercizis) ed èn dividids tenor tema: bittar/tschiffar, equiliber/ballantschar, curren/sigliar, volver/rudlar, saut e musica incl. CD, raiver/pusar, glischnar, ballantschar/pender.

e) Purschidas da moviment avertas

En il center dal «Di dal sport grischun» stattan il sport ed il moviment en l'entir chantun. En 7 fin 8 lieus preschentan las uniuns ina vasta paletta da purschidas da sport, envidan da sa participar u da guardar tiers e rendan attent a la lavur preziosa da las uniuns da sport. Organizada vegn l'occurrenza da comités d'organisaziun locals. Ensem cun l'associaziun grischuna da sport coordinescha graubündenSport ils lieus e procura per la comunicaziun.

Cun la purschida «Hallas da gimnastica avertas» u «OpenSunday» pon las vischnancas avrir lur hallas da gimnastica la dumengia e survegnan ina contribuziun finanziaria per quest intent. Uschia survegnan uffants e giuvenils spazi ed access al sport, er senza ch'els appartegnian ad in'uniun. Las purschidas èn assistidas ed i vegnan offridas pussaivladads da moviment da tut gener.

f) Gimnastica ma-pi/ba-pi

En collavuraziun cun l'associaziun grischuna da gimnastica promova il chantun la gimnastica per mammas e pitschens (ma-pi) resp. per babs e pitschens (ba-pi) sco punct inicial da l'activitad sportiva. Cun la contribuziun chantunala annuala⁹ vegnan las manadras ed ils manaders scolads e perfecziunads regularmain en il senn da la garanzia da qualitad.¹⁰ Dapi l'onn 2021 è la finanziaziun garantida sur il preventiv chantunal ordinari (avant: project fond da sport).

g) GKB SPORTKIDS

Cun il program GKB SPORTKIDS promova graubündenSport l'access dals uffants da 5 e 6 onns al sport.¹¹ Cun trenaments da basa multifars vegnan ils uffants sustegnids en lur svilup motoric. Cun cuntengns intenziunads, ch'èn a medem temp divertents ed adattads als uffants, duai il plan da trenament satisfar tant a las pretensiuns da la promoziun da la sanadad sco er a las exigenzas da la promoziun da talents. La finamira la pli impurtanta è quella da facilitar als uffants da 5 e 6 onns l'access e l'entrada en il sport d'uniuns cun agid da trenaments da fufagnadi. Dapi l'onn 2015 exista cun «GKB SPORTKIDS Special» ina purschida per uffants da 5 fin 8 onns cun impediments. Dapi l'onn 2019 dispona questa purschida dal label UNIFIED. Quest label sustegna la promoziun dal moviment e dal sport da personas cun impediments e pussibilitescha scuntradas da personas cun e senza impediments. Dapi l'onn 2021 è la finanziaziun garantida sur il preventiv chantunal ordinari (avant: project fond da sport).

6. Situaziun actuala en la promoziun dal sport

h) ARGE ALP

Il chantun maina il project da sport da la ARGE ALP e coordinescha las occurrenz da sport internaziunalas en las disciplinas skis alpin, hockey sin glatsch, patinadi artistic, ballape, tir da sport, sport da perunas cun impediments (turnier da ballape), atletica leva, cursa d'orientaziun e raiver sportiv. Mintga onn ha lieu ina da las occurrenz en il Grischun. Quella vegn organisada da la federaziun da sport respectiva e sustegnida financialmain dal chantun. Las delegaziuns grischunas vegnan sustegnidas cun ina contribuziun or dal fond da sport.¹²

i) Premis da sport

Il chantun paja contribuziuns a l'associaziun grischuna da sport or dal fond da sport per surdar il Premi da sport grischun sco er ils premis da federaziuns da sport. Dapi il settember 2020 vegnan liquidadas tut las dumondas da contribuziun per premis da sport sin via digitala.



6.3 Sport da prestaziun

a) Contribuziuns a centers regiunals e naziunals da prestaziun

Fin ussa ha il chantun promovì centers regiunals e naziunals da prestaziun cun ina contribuziun or dal fond da sport, analogamain a la promoziun da junioras e juniors da G+S. Pervia da la nova orientaziun dal sustegn naziunal dal sport da prestaziun è il sistem vegnì adattà er en il Grischun. A centers da prestaziun che han il dretg da contribuziuns per la promoziun da junioras e juniors da Swiss Olympic pon vegnir pajadas contribuziuns per finanziar ils custs da las trenadras e dals trenaders ed ils custs d'assistenza. Las contribuziuns vegnan calculadas sin basa da la part variabla da las contribuziuns per la promoziun da junioras e juniors (questa part vegn effectuada tras ils engaschaments da trenadras e trenaders) e sin basa da las contribuziuns da G+S effectuadas en il sport da prestaziun.¹³ Novs centers da prestaziun pon survegnir supplementarmain finanziaziuns da partenza.

b) Promoziun individuala

Per sustegnair giuvnas sportistas grischunas e giuvenils sportists grischuns che meritan da vegnir promovids e che possedan ina carta valaivla da «Swiss Olympic Talents», stgalim naziunal, paja il chantun ina contribuziun annuala da sustegn.¹⁴ Ina carta naziunala da «Swiss Olympic Talents» han circa 120 atletas ed atlets giuvenils en il Grischun. Dapi il settember 2020 vegnan liquidadas tut las dumondas da promoziun individuala sin via digitala.

c) Scolas da sport

Il chantun sustegna la cumpatibilitad dal sport da prestaziun cun la scola e s'engascha per in svilup intenziunà e duraivel da las purschidas da scolaziun. Cun las classas da talents exista a Champfèr, Cuira, Glion e Tavau ina purschida da scolaziun flexibla che satisfas als basegns da las sportistas e dals sportists giuvenils. Il chantun è responsabel per il process d'admissiun e sustegna purtadras da scola cun classas da talents cun ina pauschala supplementara annuala per scolara u scolar.¹⁵

Sin il stgalim secundar II unescha il Gimnasi da sport a Tavau – sco center da cumpetenza cumplessiv e sco «Swiss Olympic Sport School» – sut in tetg la scola, il lieu da trenament e l'abitar.

Er sin il stgalim da la scola media sustegna il chantun la promoziun da talents cun ina pauschala supplementara per scolara u scolar.¹⁶

Cun ina purschida da scola flexibla e coordinada garantescha la Scola professiunala artisanala Cuira (SPC) – sco partenaria da Swiss Olympic – che talents da sport cuntanschian lur finamiras da prestaziun en scola, ma hajan er avunda resursas da temp per in trenament da prestaziun sistematic.

Dasperas porschan er autras scolas grischunas purschidas da furnaziun adequatas per talents da sport.

Sco persuna da contact tranter las purschidas grischunas da sport da scola, las atletas giuvnas ed ils atlets giuvenils sco er lur geniturs dispona il chantun d'in incumbensà per la promoziun da junioras e juniors. Quel coordinescha, sustegna e collia ils interess da la promoziun dal sport da prestaziun da junioras e juniors.

⁷ Mintga onn vegnan elavuradas bundant 120 dumondas cun ina summa da contribuziun da var 300'000 francs.

⁸ Per circa 15 dumondas da contribuziun per projects da sport vegnan concedids en media 510'000 francs per onn.

⁹ Actualmain 65'000 francs.

¹⁰ Actualmain profiteschan circa 1100 uffants grischuns dal program che vegn purschi en tut il chantun.

¹¹ Mintga onn da scola sa participeschan ca. 650 uffants als trenaments en 36 lieus da lur regiun respectiva.

¹² Per il Grischun sa participeschan mintga onn tranter 140 e 180 sportistas e sportistas a las differentas concurrenz.

¹³ Ils centers da prestaziun vegnan sustegnids cun var 650'000 francs or dal fond chantunal da sport.

¹⁴ Questa contribuziun da sustegn importa 1000 francs per mintga carta valaivla da «Swiss Olympic Talents», stgalim naziunal.

¹⁵ La pauschala supplementara per classas da talents importa 4000 francs per scolara u scolar.

¹⁶ La pauschala supplementara per la scola media importa 1000 francs per scolara u scolar.

d) Sport da prestaziun e furmaziun professiunala

Il chantun coordinescha ils interess da manaschis d'emprendissadi potenzials sco er da giuvnas sportistas e giuvens sportists da prestaziun cun agid d'in post spezialisà tar l'uffizi per la furmaziun professiunala e cun agid d'in post da coordinaziun a la Scuola professiunala artisanala Cuir. Il post spezialisà dispona d'ina rait da contacts cun manaschis d'emprendissadi che sustegnan il sport da prestaziun¹⁷. El sustegna sportistas e sportists talentads tar la tscherna da professiun ed als gida a chattar ina plazza d'emprendissadi adattada.

Sco manaschi d'emprendissadi che sustegna il sport da prestaziun porscha il chantun piazzas d'emprendissadi per sportistas giuvnas e sportists giuvens. Questas piazzas d'emprendissadi vegnan er tratgas a niz.

e) Daners da scola extrachantunals

Sch'igl è – per motivs dal sport – indispensabel che atletas ed atlets che meritan da vegnir promovids visitian ina scola da sport extrachantunala e sch'i n'exista nagina purschida chantunala correspudenta, po il chantun surpigliar ils custs per ils daners da scola effectivs per frequentar ina scola extrachantunala che porta il label da Swiss Olympic.



6.4 Occurrenz da sport

a) Occurrenz da sport

Il chantun sustegna circa 500 occurrenz per onn cun ina contribuziun or dal fond da sport. Exceptadas èn occurrenz militarlas u commercialas sco er ils campiunadis regulars. Las contribuziuns importan tranter 500 francs e maximalmain 7500 francs per occurrenza.¹⁸ Dapi il settember 2020 vegnan liquidadas tut las dumondas da contribuziun per occurrenz da sport sin via digitala.

b) Occurrenz da sport turisticas

Per occurrenz che augmentan il grad d'encunuschiantscha dal Grischun sco regiun turistica e che auzan la valurizaziun turistica, che han ina im-

portanza surregiunala e che integreschan la marca «graubünden» en lur concept da communicaziun po il chantun conceder contribuziuns en il rom da la Lescha davart il svilup economic. La calculaziun è vegnida adattada en quel senn ch'il chantun po surpigliar fin la mesadad da la participaziun dal chantun e da las vischnancas, che vegn premissa per survegnir ina contribuziun federala (fin ussa in terz). Uschia sustegna il chantun occurrenz sco cursas da la cuppa mundiala da la FIS u novas occurrenz turisticas da las disciplinas da sport centralas dal Grischun en la fasa d'installaziun (p.ex. cursas da bike, occurrenz da curren).¹⁹

c) Occurrenz internaziunals grondas

Il chantun po sustegnair occurrenz internaziunals grondas. Il zercladur 2014 ed il favrer 2017 ha il cussegl grond concedì – sin basa da la Lescha davart il svilup economic – contribuziuns chantunals per realisar ils campiunadis mundials da skis alpin da la FIS 2017 a San Murezzan e per renovar la pista da la cuppa mundiala a San Murezzan.²⁰ Er ils campiunadis mundials da velo da muntogna da la UCI 2018 a Lai èn vegnids sustegnids cun ina contribuziun chantunala.²¹ L'Uffizi federal da sport elavura actualmain ina strategia per promover occurrenz grondas. Quella è d'importanza er per il chantun Grischun.



6.5 Infrastructura da sport

a) Concept per implants da sport d'importanza naziunala (CISIN)

Per construir e per renovar stabiliments da sport d'importanza naziunala po il chantun conceder contribuziuns sin basa da la Lescha davart il svilup economic, sche quests stabiliments èn cuntegnids en il CISIN e vegnan sustegnids er da la Confederaziun. Las contribuziuns per stabiliments dal CISIN vegnan per regla calculadas uschia, che l'exauriziun cumpletta da las pussaivladads da contribuziun da la Confederaziun è garantida. Dapi l'onn 2015 han quatter projects survegnì contribuziuns chantunals: l'infrastructura da passlung a Tavau, l'engron-

ment da la halla da sport Färbi a Tavau, il stadion da glatsch a Tavau e l'arena da biatlon a Lai.²²

b) Concept per implants da sport d'importanza chantunala (CISIC)

Il chantun po pajar contribuziuns tranter 10 e 25 pertschient dals custs imputabels per construir e per renovar stabiliments da sport d'importanza chantunala e regiunala. Ils onns 2015 fin 2019 n'èn vegnidas garantidas naginas novas contribuziuns. Per differents projects èn dentant avant maun dumondas. La cundiziun è che quests stabiliments sajan cuntegnids resp. vegnian integrads en il CISIC concludì da la Regenza e ch'ina federaziun chantunala cumprovia il basegn per realisar activitads sportivas d'importanza chantunala. Ed i sto sa tractar da «QUEL stabiliment chantunala» per la disciplina da sport correspudenta. Investiziuns da stabiliments dal CISIC pon vegnir promovidas er cun emprests en il rom da la Nova politica regiunala da la Confederaziun. La finamira principala dal CISIC è quella da promover ina infrastruttura da sport che satisfas als basegns en il chantun Grischun e che resguarda ils interess da la promoziun dal sport (trenament e concurrenza) sco er dal svilup economic (attractivitat dal lieu e turissem). L'onn 2016 è il Concept per implants da sport d'importanza chantunala vegnì examinà detagliadamain e revedì, ed el è vegnì cumpletta cun la promoziun d'implants da sport d'importanza regiunala.

c) Stabiliments da sport turisticas

En il rom da la Lescha davart il svilup economic e sin basa da la Nova politica regiunala da la Confederaziun po il chantun conceder emprests federals e contribuziuns per construir e per renovar stabiliments da sport turisticas (telefericas, bogns termals resp. stabiliments da wellness, chamonas CAS e. u. v.).²³

d) Stabiliments da sport d'uniuns

La construcziun, la renovaziun u l'engroniment da stabiliments e d'edifizis da sport ch'èn en proprietad privata (uniuns, federaziuns) sco er contribuziuns d'investiziun d'organisaziuns da sport per stabiliments e per edifizis da sport da terzas personas pon vegnir sustegnidas dal chantun cun 20 pertschient dals custs totals u cun maximalmain 100 000 francs per dumonda or dal fond da sport.²⁴ Exclus èn stabiliments che vegnan construids da corporaziuns da dretg public e/u che vegnan duvrads commercialmain. Dapi il settember 2020 vegnan liquidadas tut las dumondas da contribuziun per stabiliments da sport d'uniuns sin via digitala.

e) Stabiliments dal traffic betg motorisà

Sin basa da la Lescha davart las vias po il chantun pajar contribuziuns per construir e per signalisar stabiliments dal traffic betg motorisà, sch'els correspundan a las prescripziuns chantunals. Latiers tutgan trais secturs dal traffic betg motorisà: vias da velo dal traffic quotidian, vias da velo e da velo da muntogna per il traffic da temp liber sco er sendas da viandar.²⁵

Cun il «Plan sectorial Velo» existan dapi l'onn 2019 las basas planisatoricas per promover en moda persistente il velo sco med da traffic ecologic, efficient e saun per il traffic quotidian e da temp liber.



5.6 Center da competenza per il sport

a) Cussegliazion per activitads sportivas organisadas

graubündenSport funghescha sco post central e post da cussegliazion per las federaziuns e per las uniuns, ma er sco post da contact tar las instituziuns naziunals, sco Swiss Olympic e l'uffizi federal da sport. Organisaturas ed organisaturs d'occurrenz da sport, ma er gestiunarias e gestiunaris da stabiliments da sport, vegnan sustegnids en il transfer da savida e cusseglids dal chantun. En spezial en il rom da la realisaziun dal program federal Giuventetgna+Sport ha el in stretg barat cun las uniuns e registrescha lur basegns.

b) Campagnas

En il rom da la promoziun da la sanadad e da la prevenziun realisescha il chantun campagnas per promover il moviment. Las campagnas sa drizzan a tschertas gruppas en mira (p.ex. senioras e seniors). La pagina d'internet bischfit.ch intermediatescha missivas centralas davart la promoziun dal moviment e fa reclama per activitads da moviment e da sport.

¹⁷ En il pool da piazzas d'emprendissadi figureschan actualmain var 650 «manaschis d'emprendissadi che sustegnan il sport da prestaziun».

¹⁸ Las contribuziuns importan tut en tut var 800 000 francs per onn.

¹⁹ Per promover talas occurrenz ha il chantun impundi ils onns 2015 fin 2019 en media 0,8 milliuns francs per onn (2019: 1,4 milliuns francs).

²⁰ Da questas contribuziuns èn vegnids duvrads 5,2 milliuns francs.

²¹ La contribuziun ha importà 0,16 milliuns francs.

²² Las contribuziuns chantunals importan tut en tut 8,7 milliuns francs.

²³ Ils onns 2015 fin 2019 èn vegnids concedids per 13 projects emprests federals da tut en tut 16,3 milliuns francs e contribuziuns chantunals da totalmain 3,2 francs.

²⁴ A 30 dumondas per onn en media vegn pajada ina summa totala da circa 450 000 francs.

²⁵ Dapi l'onn 2016 èn vegnidas concedidas contribuziuns chantunals da var 7,5 milliuns francs. Quellas èn repartidas sco suonda: traffic da velo quotidian 5,7 milliuns francs, traffic da velo dal temp liber 1 milliun francs e viandar 0,7 milliuns francs.

6. Situaziun actuala en la promoziun dal sport

c) Cussegliazioni per spazis per sa mover e per il sport liber

Spazis per sa mover che sa chattan en la vischinanza directa da l'abitaziun sco er vias da traffic che mainan a scola ed a scolina influenzeschan decisivamain il cumportament da temp liber dals uffants e dals giuvenils. L'uffizi da sanadad e graubündenSport cusseglian las vischnancas en connex cun il mantegniment e cun la nova concepziun da spazis per sa mover, sco plazzas da giugar per uffants, plazzas da pausa, pumtracks, parcs da moviment e vias da scola segiras (guardar er il mussavia da l'uffizi da sanadad concernent spazis per sa mover).

L'uffizi per il svilup dal territori ha preparà in mussavia per las vischnancas che las permetta d'elavurar lur agen «model directiv communal dal territori». En quest model directiv ston ils spazis per sa mover vegnir integrads e resguardads da maniera pli conscienza en las planisaziuns.

Il «Plan sectorial velo» regla en moda transparenta las proceduras per promover il velo sco med da transport sco er la participaziun finanziaria dal chantun e preschenta la rait da vias da velo d'impurtanza chantunala.

d) Integrazioni da personas cun impediments

Dapi l'onn 2017 ha il chantun in post da coordinaziun da Special Olympics. Quel cusseglia ed accumpogna uniuns da sport existentas che endrizzan purschidas da trenament. Er organisaturas ed organisaturs da concurrenz e d'events èn activs e rendan accessiblas lur purschidas a las personas cun impediments. En collavuraziun cun graubündenSport vegnan purschidas scolaziuns per manadras e manadras da quest sector. Uschia gida il chantun decisivamain a realisar la Convenziun da l'ONU davart ils dretgs dals umans cun impediments en il sector dal sport.

e) Prevenziun en il sport

Il chantun s'engascha per in sport fair e net ed è participà cun in ambasadur chantunal al program naziunal da prevenziun «cool and clean». L'ambasadur intermediëscha tranter auter ils cuntegns da la prevenziun d'alcohol e da tubac en il rom dals curs da scolaziun e da furmaziun supplementara da G+S. El sustegna las manadras ed ils manaders, sch'i sa tracta da promover las cumpetenzas da vita dals giuvenils, da percepir a temp svilups privlus e da reagir correctamain. Sin giavisch stat el a disposiziun a las uniuns per referats e per lavuratori. Plinavant sustegna l'ambasadur da «cool and clean» las organisaturas ed ils organisaturs d'occurrènz da sport sco er las gestiunarias ed ils gestiunaris da stabiliments da sport en connex cun la realisaziun da mesiras en il sector da la protecziun da la giuventetgna sco er da la protecziun cunter il fimar passiv.

f) Cussegliazioni giuridica

Per la cussegliaziun en chaussas dal dretg da sport, en spezial en dumondas dal dretg d'uniuns, dal dretg da federaziuns sco e dal dretg da responsabladad, ma er en dumondas dal dretg contractual u fiscal en connex cun il manaschi da sport stat a disposiziun a las uniuns ed a las federaziuns da sport in servetsch da cussegliaziun giuridica da l'associaziun grischuna da sport (BVS).

7. Organisaziun dal sport en il chantun Grischun e collavuraziun cun las instituziuns ch'èn participadas a la promoziun dal sport

Per avair success dovra la promoziun dal sport ina buna collavuraziun ed in entretschament correspundent da tut las instituziuns da dretg public e da dretg privat ch'èn participadas a la promoziun.

7.1 Incumbensas dal chantun

Entaifer il chantun sa fatschentan plirs posts directamain ed indirectamain cun la promoziun dal sport e dal moviment. Ina buna collavuraziun interdepartamentala da las suandantas partiziuns è perquai da gronda impurtanza per realisar il concept qua avant maun:

- La partiziun graubündenSport da l'uffizi per la scola populara ed il sport inizescha e coordinescha la promoziun dal sport e dal moviment en il chantun Grischun e stgaffescha las premissas per realisar las mesiras tenor la Lescha da promoziun dal sport e tenor quest concept. Cun ina vasta paletta da servetschs e da contribuziuns finanzialas sustegna ella projects ed activitads che servan ad in svilup positiv dal sport. graubündenSport s'engascha per che las regiuns, las vischnancas, las uniuns e federaziuns da sport sco er ulteriuras acturas ed acturs hajan cundiziuns optimalas per promover il sport. Ultra da quai è graubündenSport responsabel per tut ils secturs da la promoziun dal sport che n'èn betg vegnids attribuids ad in auter uffizi.
- La partiziun Svilup turistic da l'uffizi per economia e turissem promova – sin basa da la Lescha davart il svilup economic – occurrenz turisticas (per il solit occurrenz da sport en las disciplinas da sport centralas dal Grischun), infrastrukturas da sport turisticas (p.ex. stabiliments da sport d'impurtanza regiunala, chantunala e naziunala, telefericas, bogns termals resp. stabiliments da wellness) sco er auters projects turistics che stattan en connex cun il sport (p.ex. graubündenBIKE). La promoziun vegn fatga cun la finamira d'augmentar la creaziun da valurs turisticas, l'attractivitat dal lieu sco er il grad d'enconuschientscha dal Grischun.
- La partiziun Promoziun da la sanadad e prevenziun da l'uffizi da sanadad realisescha programs chantunals. Actualmain èn quai quatter puncts centralis: moviment, nutriment e pais saun tar uffants e tar giuvenils; sanadad psichica; sanadad en la vegliadetgna; prevenziun da

dependenza. Sche necessari vegnan las mesiras fixadas entaifer ils departaments.

- L'uffizi da construcziun auta procura che l'infrastructura architectonica ch'è necessaria per ademplir las incumbensas chantunals da sport, vegnia messa a disposiziun resguardond las pretensiuns da qualitat, da custs e da temp.
- La partiziun Traffic betg motorisà da l'uffizi da construcziun bassa coordinescha la planisaziun, la construcziun e la signalisaziun dal traffic betg motorisà tras las vischnancas e fixescha – resguardond las vischnancas e las regiuns – la rait da vias per il traffic betg motorisà. Ella represchenta ils interess dal traffic betg motorisà en cas da conflicts cun autras infrastrukturas.
- Per tgirar la rait da sendas da viandar, che ha ina lunghezza da circa 11000 km, ha il chantun surdà ina incarica da prestaziun a l'organiziun Sendas grischunas. Uschia è questa organiziun responsabla per sustegnair las regiuns e las vischnancas tar la planisaziun, tar la realisaziun e tar il mantegniment da las sendas da viandar. Quest sustegn cumpiglia la cussegliaziun specifica, la procuraziun d'infurmaziuns da basa sco er la coordinaziun da projects da sendas da viandar.
- La Cumissiun per promover il sport vegn elegida da la Regenza e cusseglia il Departament d'educaziun, cultura e protecziun da l'ambient (DECA) sco er la Regenza en dumondas da la promoziun dal sport. Ella examinescha las dumondas da contribuziun che vegnan pajadas or da la finanziaziun speziala Sport, ma che surpassan 25000 francs, e fa in giudicament specific per mauns da la Regenza u dal DECA.
- L'uffizi per la furmaziun media-superiura è il post da servetsch cumpetent per il sector da las scolas medias (scolas medias privatas, Scuola chantunala grischuna) e per il stgalim terziar (scolas autas, instituziuns da perscrutaziun, furmaziun professiunala superiura e furmaziun supplementara). En questa funcziun ademplescha el er incumbensas da coordinaziun e da direcziun per las scolas che han purschidas da sport cun structures specificas.
- L'uffizi per la furmaziun professiunala maina in post spezialisà Furmaziun professiunala e sport da prestaziun. Quest post ha la finamira da porcher soluziuns flexiblas, per che atletas giuvenas ed atlets giuven possian cumbinar opti-



7. Organisaziun dal sport en il chantun Grischun e collavuraziun cun las instituziuns ch'èn participadas a la promoziun dal sport

malmain lur carriera sportiva cun lur furmaziun professiunala. Il post spezialisà dispona d'in pool da plazzas d'emprendissadi tar interpretas che sustegnan il sport da prestaziun e ch'èn prontas da porscher ina piazza d'emprendissadi cun cundiziuns generalas spezialas. Durant la scolaziun sustegna il post spezialisà ils manaschis d'emprendissadi e las scolas professiunals e funghescha sco post da consultaziun neutral en cas da conflicts.

7.2 Collavuraziun cun ils organs federals e communal

La politica chantunala da sport resguarda la Lescha e l'ordinaziun federala per promover il sport sco er ils concepts federals per promover il sport da massa e da prestaziun. graubündenSport è responsabel per manar, organisar, realisar e promover Gjuventetgna+Sport (G+S) tenor las prescripziuns da la Confederaziun.

Las vischnancas èn las proprietarias e las gestiunarias las pli impurtantas da stabiliments da sport en il chantun. Ellas organischeschan l'instrucziun da sport en la scola populara e promovon il sport ed il moviment sin plaun local. Las regiuns procuran che las incumbensas da las vischnancas vegnian coordinadas en moda adequata. Il chantun sustegna l'activitad da las vischnancas en il rom da las prescripziuns legalas e las metta a disposiziun sia cussegliaziun. Sco punct central da svilup en il program da la Regenza 2021 – 2024 (guardar chapitel 5.6.c) ha la coordinaziun dal sport ina piazza impurtanta en il catalog da mesiras da la promoziun dal sport. Qua tras vegn mess il crap da fundament per ina promoziun dal sport persistente e locala.

7.3 Collavuraziun cun organisaziuns da sport, cun organisaturas ed organisaturs d'occurrentzas da sport, cun purtadras da programs e da projects che vulan promover il sport ed il moviment, cun organisaziuns turisticas e cun persunas privatas

Las uniuns da sport e lur federaziuns èn las organisaturas las pli impurtantas da trenaments da sport, da curs da sport e da concurrenz. Ellas organischeschan occurrentzas da sport e prestan uschia ina contribuziun impurtanta a favur da la promoziun dal sport da giuventetgna, dal sport da massa e dal sport da prestaziun. Il chantun collavura stretgamain cun ellas. El po delegar incumbensas a las organisaziuns da sport e far contracts da prestaziun cun ellas.

Sco federaziun da tetg represchenta l'associaziun grischuna da sport (BVS) ils interess dal sport grischun ch'è organisà tenor il dretg privat, e quai envers las autoritads politicas, envers l'economia, envers autras organisaziuns da sport ed envers la publicitad. La promoziun chantunala dal sport collavura cun la BVS en spezial er per realisar projects sco p.ex. il «Di dal sport grischun». La BVS organisescha plinavant la «Notg grischuna da sport» che ha lieu annualmain, ed edescha il «Anuari grischun da sport». A tuts dus projects conceda il chantun in sustegn ideal e finanziel.

Il chantun po er collavurar e far contracts da prestaziun cun autras purtadras ed auters purtaders che lavuran en il sector da la promoziun dal sport e dal moviment (organisaturas ed organisaturs da programs e da projects, organisaturas ed organisaturs d'occurrentzas da sport, turissem, persunas privatas).

7.4 Entretschament da las instituziuns ch'èn participadas a la promoziun dal sport

En il sector da la promoziun dal sport collavura il chantun cun tut las instituziuns menziunadas en ils chapitels 7.1 fin 7.3. El stgaffescha cundiziuns generalas adequatas per colliar ina cun l'otra las forzas ch'èn participadas a la promoziun dal sport. El tgira in contact regular cun questas organisaziuns.

8. Realisaziun



Cun il conclus dals 29.6.2021 ha la regenza decretà il concept per promover il sport e deliberà el per la realisaziun. Las vischnancas e l'associaziun grischuna da sport vegnan envidadas a la collavuraziun ed a la realisaziun dal concept.

Publicatur



Kanton Graubünden
Chantun Grischun
Cantone dei Grigioni

Amt für Volksschule und Sport
graubündenSport
Quaderstrasse 17
7001 Chur
Tel. +41 (0)81 257 27 55
sport@avs.gr.ch
www.graubuendensport.ch

Layout e stampa

communicaziun.ch

Funtauna dals maletgs

GettyImages
Graubünden Ferien
graubündenSport
Moove Mee GmbH
UHC Alligator Malans